

晚

晴

移

詩

匯

晚晴詩匯卷一百五目錄

茹棻二首

成書十二首

吳芳培六首

文翰二首

張端誠一首

邵玉清二首

李驥元十一首

魏成憲二首

張德懋二首

葉蓁二首

費錫章七首

錢清履四首

柴杰三首

徐鏐慶六首

賈汝愚一首

薩玉衡三首

楊灝二首

孫芻一首

王學浩六首

沈嶧二首

孫星衍十首

吳烜一首

馬履泰 三首

李如筠 四首

顧鉦 一首

錢豫章 二首

翁樹培 六首

楊夢符 六首

劉廣恕 一首

沈叔埏 六首

宋鳴珂 二首

周鏐 二首

陸元鉉 三首

何道生 五首

尹英圖 一首

劉廷楠 三首

顧敏恆 二首

沈清瑞 六首

晚晴移詩匯卷一百五

徐世昌

茹棻字穉葵號古香會稽人乾隆甲辰一甲一名進士
授修撰官至兵部尙書有使充使晉使楚使南使瀋
詩草

刺桐花

黃童墓下聽排衙定省餘閒坐碧紗今日重來遺老盡道
旁開徧刺桐花

晨起

晨起竟何事檐前宿鳥催履畦嫌水漫倚檻待花開藥餌
供多病關山老散材奚奴解常課先洗品茶杯

成書字倬雲滿洲旗人乾隆甲辰進士授戶部主事官

至戶部侍郎贈都統有多歲堂詩集

詩話傳雲爲寶臣尙書錢良高祖以樸誠結主知嘉慶中疏請保護聖躬言人所不敢言因事屢遭譴謫幼好吟詠年十六作春雨詩以才調見長及入秦隴後詩境日高五古近杜七古近韓

春雨

一夜雨聲遲清寒生薄帷今朝庭院裏誰詠落花詩柳色青垂眼山光淡掃眉殘春知己盡攜酒聽黃鸝

芹泉用趙秋谷韻

雞鳴戒征鞍殘月猶在嶺很石出犂确倦客畏馳騁徐行得佳境欲過心猶耿平沙埋馬蹏小雨不作濇回頭看亂山直若脫陷穽少焉天宇闊日出萬峯頂空翠濶谷陰峭蒨竹柏影平溪清見底潔不容鼃黽草屋傍山田百家共一井人稀雞犬靜徑僻荒穢屏田家聚妻孥操作趁朝冷

對此念鄉閭我心更孤迴茲行方未央歸轡何時整輪他
田舍翁飯熟呼不醒

潼關

邃岸天高澗道隕連雲戰壘列崔嵬黃河一曲環城去華
嶽三峯劈面來練卒骨寒桃塞月尙書血碧柿園苔覆車
千載眞同轍降虜捐軀盡可哀

望嶽

關門積宿陰初日猶黯黯清風蕩晨煙嶽色不可掩三峯
拔地起突兀勢非漸青天削芙蓉秋水見菡萏高撐影矗
矗峭刻意斬斬羣山遠羅列趨附若阿諂森然白帝尊壁
立凜莫犯蒼茫古三輔勝蹟皇圖覽八州會地形兩戒劃
天險巨靈擘其拳一手欲衆攬金天肅殺氣萬古不自貶

憶昔曾夢游巉巖墮心膽鐵鎖怯攀援石徑記坑坎今來
咫尺間阻隔抱深歉巖壑想彷彿臺觀虛指點遙望白雲
封萬景入奇斂爲我謝山靈少勇老未減東歸儻如願赴
險吾猶敢

嶽祠

潼津直上車隆隆綠楊夾道馳青驄太華可望不可到小
憩暫謁金天宮尊嚴廟貌象丹闕人力不逮疑神工入門
一徑翳天日列植漢柏兼秦松升階俯首拜深殿神魂謾
謾欽聲容巍峩白帝據黻座神威肅穆尊彌恭衆眞立侍
各執事大冠長劍威儀同十王列廡聚羣鬼或置鼎鑊加
磨舂窮姦變怪狀千萬森羅果報驚愚蒙轉屏環柱出殿
後橫廊直互趨深重紅裝十隊肄舞樂修眉秀頰爭昌丰

洞房陰陰窗牖靜畫簾高卷香羅紅衣桁盥洗紛位置兒
襦女舄筐篚充衾枕粲爛煥雲錦冰綃作帳輕煙籠帝妃
端坐燕笑語意態真有齊眉風廟令老人事神久房幃曲
折無不通手持管鑰導我入誤驚閨闈心忡忡我聞華嶽
作西鎮興雲降雨參天功惟神正直司肅殺秩宗典禮方
三公眞宰冥漠太虛朕豈有家室相和雍嫁女奪婦事疊
見荒唐誣蟻眞齊東愚民無知好蠱媚遂以猥褻明尊崇
神之所依甯在此誰爲戸喻開盲聾茶餘扶倦上高閣俯
仰百態舒心胸須臾雲散日卓午晴空劃出三芙蓉

峽口

向夕陰風來亂山漸蕭索兩峯忽相參再轉境彌惡峽深
天欲斷道窄壁如削陰崖無草木盛夏亦光濯狼石積鐵

黝奇狀獻斧鑿負隅猛虎蹲作勢厲鬼攪濛濛黃霧映慘
慘白日落久役亂驚魂畏途愁病腳出峽稍平曠石轍猶
犖确神傷自昔然何心記邱壑

黃蘆岡

沙草黏天落日曛伊城鼓角隔宵聞邊民爭識新都護遺
老能言舊使君未報殊恩輕絕域近編家集續從軍黃蘆
岡上秋風起獨倚危樓看暮雲

雨

大磧千里平不頗陰山雪流爲衆河土人知風不知雨亢
旱不死田中禾三伏濃陰偶一見或飄點滴無滂沱今年
六月忽大霈天公有意脫白窠雲雷之師赴新令嚮所未
到初經過霹靂一聲聊小試亂吼兒女驚翁婆雖然揮灑

無半刻牆津屋潤庭生波須臾雲散皎日出綠楊高柳新
枝柯天清地曠靜氛翳平沙貼地無坑窩人言雨隨使君
至洗滌戈壁除煩苛此言孟浪不足道少見多怪訛傳訛
皇王德化近及遠窮荒漸喜陰陽和豈有人煙富生聚可
無雨露銷沈痾貪天之功聖所棄慎無出口高明訶

廟兒溝

亦自成村落翻憐絕市喧野花紅自媚雜樹晚猶繁古寺
依山立殊方見佛尊曉來風日好沙水亦潺湲

塔爾納沁

亂石卧斜陽孤城接大荒秋原認禾黍低草見牛羊煙火
新屯聚風雲古戰場無由問沿革獨立向蒼茫

平浪神祠感舊

轉眼韶華四十秋此身直擬泛虛舟重來古寺人如舊尙
有殘僧記昔游隔院軒窗堆瓦礫故園祠墓感松楸一官
流浪成何事坐對庭烏歎白頭

發葉爾羌

河湯湯沙茫茫鳥飛不到胡天長秋風未起氣先肅胡桐
葉淡天雨霜僕夫早起車載牽相與踴躍營歸裝竄逐窮
荒二萬里羶腥乳酪成馨香久與兒孫作死別五年不復
夢故鄉今日生還的有據驅車轉覺心徬徨氈裘君長抱
馬足譯語略通神慘愴漢使如天比父母使君棄我何蒼
黃異類有情相處久別之亦覺情內傷無德與汝愧遠送
片語相贈休遺忘屬賓生靈百萬戶女絲男縠勤耕桑汝
門忠孝著奕世好爲聖主修邊疆但使休和薄稅斂自然

鞏固如金湯老夫不復更來此精誠與汝遙相望

吳芳培字霽霏號雲樵涇縣人乾隆甲辰進士改庶吉士授編修官至兵部侍郎有雲樵集

散策

獨坐苦無聊散策城南寺恰近日中期鄉里趁墟至寄賣兩廡下擺列書畫肆偶然一觸目惡札墨豬字破爛小說本唾餘人所棄詩文新剗廁錦函藏篋笥檢閱一二卷令人昏欲睡有客喧呼來云是迎官吏風塵眯我眼急欲出寺避出寺逢丈人衣冠與俗異邀我欲同行情款頗真摯無奈一啟口便足敗人意強作爾馨語啗哈不見愧豪門及顯達丁甯問再四我笑不欲答揖別如展翅牆陰見犂牛飽食眠貼地相對惟牛好不問人間事

舟中望九華山

五月買舟潯陽道水色天光入懷抱仰面貪看兩岸山連
崖不斷蒼翠好搶風直下皖城東江邊煙霧清若空瞥見
天工刻削青芙蓉使我一朝豁然明雙瞳雕鏤嵌空花萼
秀玉樹交拂雲霞紅巘峴迴出眾峯表岡阜那敢與爭雄
譬如畸人逸士昂然立衣冠鬚髮不與尋常同昔時太白
欣見此名以九華易九子夢得平生歎奇絕不讓太華及
女几我亦見之發狂叫急欲扶筇躡雲嶠峭帆風緊不可
留末由登陟逞閒眺迄今默坐憶山容獨覺玲瓏呈萬竅
登齊雲山頂
四顧無高阜羣峯此獨尊泉聲雷萬壑雲氣海千村路轉
蜂腰細崖空虎迹存何年方外客化石立山門

和霽芸二弟新秋感懷之作

曲肱敲卧小園東
寶鴨香殘午篆空
熱不因人荷上露
惠而好我竹間風
睡魔每到愁城伏
詩將全憑酒地雄
盡日捫心思往事
寒鐙夜雨與誰同

金陵道中

岸邊山色綠嵯峨
旋放輕舟入汊河
郡郭尙遙先見塔
江流已遠欲無波
避人沙鳥驚飛去
招客湖菱喚賣多
隔浦寒蘆孤月上
清宵伏枕聽漁歌

雞鳴寺望後湖

寺在雞籠最上頭
後湖千頃望中收
綠蘿叢裏曾書庫
白藕香中只釣舟
北極浮雲孤閣迥
西風殘照六朝秋
一聲玉笛紅牙拍
腸斷秦淮舊酒樓

文翰初名文甯字遠泉滿洲旗人乾隆甲辰進士官至
刑部侍郎有精勤堂遺藁

塞馬

塞馬無聲齧草根春寒野曠步黃昏誰家豆棧難忘卻又
逐牛羊入遠村

出古北口至狼窩汎卻迴射堂漫賦

山館無人慰寂寥尋春不見思迢迢花如隔霧開林園柳
已含煙映野橋輦路沙平初過雨塞河水淺亦生潮流連
光景酬霜鬢款段經行廿里遙

張端誠字硯溪南皮人乾隆甲辰進士歷官順天府府
丞

西園卽事

端居人跡少檻外日初長春雨不成點桃花紅過牆閒雲
停作片虛室靜生香自笑從前拙輪蹄爲底忙

邵玉清字履潔號朗齋天津人乾隆甲辰一甲三名進
士授編修歷官司業

題綠陰春泛圖

最愛風光好江南二月天波平楊柳岸人上木蘭船樹近
層樓隱雲低遠嶂連勝游成往事夢想已多年

咫尺橫塘路披圖逸興遙春深鶯語滑風軟柳容嬌欸乃
聞柔艣依稀渡小橋雙柑攜酒客畫裏坐相招

李驥元字鳧塘蘇州人乾隆甲辰進士改庶吉士授編
修歷官右中允有李中允集

王蘭泉曰鳧塘詩有奇
氣與兄墨莊工力悉敵

詩話法梧門稱鳧塘苦吟每構思屏棄一切有薛道衡陳后山之風然其詩並無艱深之語五律最擅勝場如夜行云霧濃山月暗林缺寺鐘明所思云雜樹花仍發三江客未還野望云霜凋秋樹瘦雲補遠山肥皆名句也

別姪朝礎

潞水東歸海潼關北護秦此行重陟險相望各傷春雨暗
山中樹雲高馬上人莫忘癡叔語努力愛吟身

所思

春風無待約特地到窗前雜樹花仍發三江客未還斷雲
依海水晴日遠吳天世路艱難悉歸來枕石眠

喜墨莊兄回京

三載天涯滯歸無別物持江山吳越畫煙月魯齊詩談至
日斜後飲觀星出時家庭殊旅宿歡笑自忘疲

野望

策馬城西望郊原帶夕暉
霜凋秋樹瘦雲補遠山肥
躍水參魚樂橫空慕雁飛
偶偕農父語昏暮尙忘歸

寄姪朝礎

醒園當日共嬉游采菊東籬趁晚秋
步月每過延月洞穿雲多上看雲樓
曉逢村媪沽新酒日伴漁翁戲小舟
回首故鄉千里隔思君況動別離愁

得家書作

羈人每恨得書難比至書來不忍看
已爲家貧傷米貴何堪歲暮惜衣單
霜枯塞草山俱瘦雨減汾河水正乾
好挾太行雲兩片相隨征騎到長安

定興道中遇張叔舉

勦

檢討同年典試陝西回京

父沒不扶歸母老不侍旁積此萬古恨饑驅游他鄉南風
蒸六月客子汴梁歇西風下太行艱險磨瘦骨瘦骨不自
怨雲飄海東去回憶北堂萱意馬索難馭君歸步金鑿天
顏爲之歡願一見吾母言驥身平安家遠知自愛天寒知
著裳勿爲游子念倚閭朝暮望

釋口

楚天遲雪霜千里青不斷舟將嘉樹迎目隨遠山轉篙師
午繫纜游子夜登岸岸連天上月沙聚雲中雁人來雁行
飛河動月光亂蔣蒲碧叢叢鐙火紅爛爛楚女不冶客門
中自炊爨烹魚復煮酒殷勤供客案太史若觀風茲風自
江漢

天雄關

左排山萬峯右包江一道轟轟天雄關衝霄崖未了地鳴
鐘鼓多天入秦隴小波濤碧油油霜霰白皓皓自經閣道
行羣山拓懷抱及茲厯益峻如鶴凌蒼昊莫去尋山僧僧
歸白雲表

龍洞背

逆龍引秦水直向此山送山靈塞前途雲崖密無縫龍怒
張爪牙穿石遂爲洞千里闢成河一門開若甕水聲與石
聲今古兩相闕山中何所聞來去鳥音哢幽意快心曲徐
攬青絲鞵

贈何雲峯

去年殘臘天雨霜吾子墨線登我堂躑躅哽咽聲不揚邊
塵染衣風透裳爲言乃父歿異鄉仕宦致此心摧傷生前

故交歿後忘昔周人急今空囊劍關迢遞秦隴長丹旄何
由歸梓桑我方鼓缶歌悼亡絃琴斷絕難更張側身三晉
觀樂陽山魍魎泣魑魅狂何處招魂陳酒漿束裝無策心
茫茫今茲垂柳復垂楊安得送汝歸金堂

魏成憲字寶臣號春松仁和人乾隆甲辰進士歷官御
史有清愛堂集

舟次曲江題家書後

每日扁舟向翠微鷓鴣相喚燕交飛春從薄暝輕寒過人
自三楓五渡歸西笑底須愁索米南禪曾此話傳衣預思
櫻筍登廚候到及林園綠正肥

余將出都伊墨卿邀同羅兩峯聘法時帆式善馬秋

藥履泰汪劍潭端光李石農鑒宣蔣礪堂攸錦曉

過崇效寺看花歸集寒玉齋餞別

高柳青浮積水涯
輕陰漠漠帶初霞
曾藏人海仕如隱
頻款禪房心出家
舊雨歡場鴻印合
春風香徑燕飛斜
一尊更盡情難別
爲有此君共此花

張德懋字允昭號芥洲又號研儂滿城人乾隆甲辰進士歷官戶部員外郎有石蘭堂詩

清化驛早行

蘭江渡後又潯河
複嶺重岡策馬過
蟋蟀咽涼秋思早
樓欄戰葉曉風多
萍花一畝分鷗鷺
松徑千山暗薜蘿
我欲揚舡問湘浦
大江渺渺洞庭波

題寓齋壁

丈室重開選佛場
依然三宿戀枯桑
但知坐嘯依修竹
不

信無詩到海棠隔院樹陰涼送雨入簾花氣夜添香由來
吏隱多蕭散未羨中書食萬羊

葉綦字履仁號栗垞東陽人乾隆甲辰進士有栗垞詩
集

出門

試鐙風裏道途寒臘雪經春尙未殘客路便從鴻外去家
山猶背馬頭看飢來驅我悲元亮熱不因人愧伯鸞難忘
臨行慈母語出門辛苦屬加餐

晚風料峭襲黃昏鐙火沿隄過幾村越客淒涼方卧雨吳
歌斷續易銷魂鐘聲虛隱寒山寺橋影斜通破楚門何日
蘇臺楊柳色泥人懷古倒芳樽

費錫章字煥槎號西塘歸安人乾隆甲辰召試舉人歷

官順天府尹有一品集使黔集

詩話西塘於嘉慶十三年奉使琉球清介自持不辱君命觀其致中山王卻金一書辭義凜然而琉球紀事詩一百韻尤可備此邦掌故其詩善道人情及刻畫物狀清和宛轉蔡叔子所謂雖無滑幹然亦清立者也

宿蘭山驛寄晚宋小坡給諫

澍

揮手征途涕淚新那堪重話去來因名高大諫偏無祿壽甫中年況有親往事煙雲真若夢異時桃李可成春清泉一勺君知否同是西臺被劾人

姑米洋候風

海中無可泊惟有隨風盪漾所恃者一桅片帆而已

萬濤圍一葉四顧更無舟不辨魚龍氣真成日夜浮天圓低似蓋水活碧於油欲問蓬萊路神仙未可求

泉崎夜月

蓬瀛望不極復此憩流泉共許心如水相看月在天歸雲
籠島樹遠火黯漁船回首中華路幾疑傍斗邊

紅梅松

世間異物難理揣松不在山轉在海輪囷蟠屈勢天斜龍
宮夜夜騰光彩想當日月浴波濤萬篋沈浸醲如膏馮夷
手種天吳植染將青鬣成紅毛奇材不肯自埋沒風來突
與潮爭高潮退漁人恣競折七尺珊瑚硬拗捩夷官持贈
種甃盆淋漓猶滴蛟螭血初時腥氣撲人衣日久亭亭漸
修潔攜歸中土耀殊產芸窗日夕芝蘭焚雖無南粵千金
橐且載東溟一片雲

琉球紀事一百韻

積水通暘谷橫流劃大荒山從波底拔人向島間忙噴薄

魚龍氣昭同日月光溯源盤古埒戡亂舜天强琉球與日本同爲人

皇後裔天孫氏之世其臣利勇擁衆自立舜天討而誅之衆推爲主遺種滋蕃育餘黎寢熾

昌隋書名始著明史氏初彰承樂中賜姓尙氏久矣懷中夏幡然

恥夜郎艱危勤櫛沐宛轉達梯航蚡冒纔開楚椒聊已詠

唐翼緣侵沃滅虢亦恃虞亡自此連三省舊爲山南山北中山三國明咏

樂時併而爲一今稱三省因而擅一方辨戈開國神名承系統當壁驗真王

世業經興替私衷倍悚惶首先依定鼎順治三年卽進表請封踵接

賀垂裳序次句驪右班聯御幄傍袞旒施祖考幣帛逮嬪

嬙奉朔遵時憲于東奠土疆戚休縈眷注災患許扶匡習

俗沿蒙昧專員代測量康熙五十八年遣八品官平安測星與吳越同屬女牛之次俱在丑

宮地稽吳越近星訂女牛祥屬籍刊盟府功宗紀太常五

朝修職貢七姓效劬勩明洪武間賜閩人三十姓爲通事今存七姓厥篚陳蕉

芋充閑罷驢驢

向例貢馬康熙二十二年奉旨停免

蠻箋繙側理陰火劇疏

磧扇冀皇風拂刀呈武庫藏

貢物以上所

鑒誠恆獎綢厚往必

優償睿藻頒題額彤雲擁畫梁戰圖麟閣貯輟賜雀屏張

彝器罇兼占奇珍琬與璜繽紛周黼黻斑駁漢琳瑯

以上

賜既普菁莪化

入向准官生監讀書

還貽翰墨香凡茲宏在宥孰是

感能忘迺者遭多難嗟哉悼幼殤告哀循故典嗣服進郵

章舉國知重耳羣情愛子臧痛維蕭底本敢謂雁分行攝

位仔肩荷殫精庶政康慎封虔鎮撫主鬯妥丞嘗惟帝恢

無外宣綸出未央八駟迎蕩節雙舸下蚪洋存歿均肅怙

君臣儼對揚祭憐新鬼小

前王尙成薨甫四歲

恩溥舊邦長載啟延

賓館咸升敷命堂

天使館名

瓦甌攢玳瑁

色

門牡闥鴛鴦

上下

刻雙溝道左右啟閉

圍棘姑羅

樹名

幹崇墉礪石牆赴桓屯虎旅甌脫

坼蜂房笳吹晨昏劇餽牽旦夕將輓輪划獨木

船

供億頂

柔筐

凡物戴而不負

亟見臺來餽翻愁跑用傷

赤足無履

醺醺澄酒醴

霍霍伺豬羊束縛蛇皮黑支撐蟹距黃鉅烘乾噬腊米嘔

膩含漿漫說頻加飯何曾暫徹薑

蔬菜之外無一不腥

平生幾食料

異域具膏粱好證游仙夢遐思選佛場敲棋疑鵠至仿帖

眩鸞翔文憚韓蘇健詩驚李杜芒沁脾咀蔗尾燥吻擘瓜

瓢不暑晴添熱非秋雨送涼蛟涎朝更毒蜃霧晚尤滄蜥

蜴聲如鵲蚊蟲陣若蝗但逢寒燠換便覺起居妨吟嘯消

岑寂登臨展眺望攜童尋勝蹟杖策步層岡迤邐停丹港

參差繫馬柳兩崖排鐵板

沙

百雉鞏金湯融結成都會衣

冠萃濟蹌歸仁

島名王子分守之地

藩分壯守禮

王城名

燕詒慶井養

疏泉竇師貞戢劍鉞

第一寶劍彼國歷世珍之

申宮嚴禁衛微道設亭

障粥教爰增律新定刑律十八冊譽髦並建庠新建學宮前此富

須廣樹藝暇卽浚池隍欲繼前規擴全憑治法良順途招

父老憩坐話農桑亦有土絲質樸形殊瑣兜離語卻詳公田卿

以下有世祿俱借樂歲之穰薯蕷貧家糗粝茨野處糧錢輕

鳩目錢名刮筆硬鹿毛僵剔抉螺稱貝陶鎔錫號鋼民龐羞

狗盜境無里美賤狐倡紅衣人皆來自志錄猶仍誤咨諏

待細商迢遙南暨北荏苒露爲霜聆樂偏惆悵聞雞每激

昂掃除徐孺榻點檢鬱林裝贈賄儀終褻堅辭意豈僖七

宴金二百六十二兩臘哀編皮盡篋纂治平要略叢繪襲

巾箱繪文海冊封及各客靜搜殘帙奴頑笑澀囊駢倉深

比甓力海船坐矮於牀吉果圓揉粉彩球音讀糕滑糝

饌菜肥舉苜蓿麪潔磨桃榔皆所贈信宿奚求備綢繆且

預防喧呼伐鉦鼓踴躍挂帆檣隱念祈呵護齋心默禱禳
再看濤滾滾又涉浸茫茫熟路滄溟闊恬瀛聖澤懷回頭
夷壤杳屈指嶺梅芳曼壽皆歡喜干官正拜颺微忱徒縈
繾綣直後趨蹌縹緲瞻壺嶠晶熒認角亢乘槎旋海屋願
晉萬年觴

樊城感左甯南事

沿江星散左家兵犄角荆襄勢不成未必將軍真跋扈轉
教羣盜得縱橫兒童罷唱銅鞮曲塗巷虛傳鐵馬聲百七
十年遺蹟盡襄城回首暮雲平

大霧行辰溪山中

毒霧曉彌漫騰騰氣蒸釜煙雲復與會有日不教吐層疊
湧不窮自朝直至午見地不見天馬上首恆俯初疑衣裳

冷著手溼如雨漸覺頭冬烘涔涔類中壘幸皆飽餐來不
然入肺腑人生未閱歷但樂那知苦頗憶江南天薄霧亦
常覩一葉搖輕舟空濛指遠浦最好夢迴時呶啞數聲鶻
錢清履字履徵號竹西嘉善人乾隆甲辰舉人歷官湖

北白河口同知有松風老屋詩藁古芸樓詩鈔

詩話竹西爲恭恪公孫鶴雲觀察子嘗宰蘄水嚴斥
城清戶籍發姦摘伏甚有政聲六十後告歸以清望
式鄉里平生喜爲詩輒軒輊錄采登數篇皆官楚時
作晚年病蹇而其子遠游不以時歸老懷悵悵恆見
於篇什

病不出門詩柬孫白軒毛芳谷范聽庵三君

聞道吳閶二月天清明時節起新煙塘橋綠水尋花柳湖
舫紅鐙醉管絃憶昨閒情曾翫賞知君勝地更留連自憐
跂腳南窗下空夢珠樓綺閣邊

夜雨十二韻

徹耳淋浪雨黃昏不住聲銀鐙微燄淡布被嫩寒生涔涔
簷承溜沈沈柝轉更去微熏艾蒻煨藥響爐鎗梅豆將黃
熟苔斑已碧盈瓦跳珠錯落階觸玉琤琤遙想田渠滿還
知港漲平溪邊閒立釣隴上苦鋤耕石燕衡雲拂林鳩繞
屋鳴麥畦藏雉雉柳岸歇嘯鶯似此連朝霏難教十日晴
我愁如草長點滴夢頻驚

荳鄰方伯新建梁高士祠徵詩

江東步兵萼鱸歸江湖散人釣具隨姑蘇臺上麋鹿走胡
爲越相吳中祠三高應黜鴟夷子祀典莫若扶風宜霸陵
山中耕織隱居齊居魯猶何之謁來吳市賃廡下布衣椎
髻偕賢妻定交杵臼敦古意伯通相遇心相知生前著書

當季漢死後穿冢鄰要離茫茫時代千百載漆鐙堂斧難
尋遺忽看崇煥屋宇建棲靈定在皋橋西辦香虔奉有華
胄遙遙俎豆懷前徽當官更欲勵末俗頑懦興起聞風師
逸民作頌亦自譽高士入傳無交譏几筵再拜前致詞神
之來兮是運期易姓運期名鴻飛冥冥我所思神之去兮
還歌噫見後漢書

酬郭少廉茂才

補

銀漢昨橫秋不雨威餘夏槐花舉子忙秋風各整駕我輩
蕭散人孥輒熱猶怕南皮文酒會追暑若望赦盈斛釀葡
萄堆盤果蓏蔗籬落絡緯鳴秋娘及時嫁簪裾并山王槃
敦聯顏謝主人好客殷地偏游興藉圖畫壁縱橫名手連
城價疎梧修竹間怪石山可借水隔東西溪居鄰南北舍

陳子封篆隸古筆不競姪姪君才更橫逸明珠光照夜胡
不去省闈宜乎老叟訝

柴杰字臨川錢塘人乾隆丙午舉人官國子監助教有

百一草堂集唐附刻

詩話臨川父次山上舍有集唐詩初二集臨川亦集
唐詩二卷每題皆有小序自爲箋釋又輯斯人詩存
乾隆十六年三月高宗南巡臨川以集詩獻召
試行宮年七十舉於鄉其賜官助教已八十矣

九曜石

巖壑契冥搜李羣玉晴添瑞景浮薛能亂煙籠碧砌王飛閣跨

澄流虞世南獨自成千古王維悠然寄一邱田子開襟坐霄漢

宋之問卓犖傾枚鄒韓愈

池島清陰裏羊士諤徘徊吟繞廊修煙花騰几席孟星斗煥

文章杜牧地勝林亭好孫風回錦繡香杜靈芝三秀氣王睿

澤喜洋洋莊韋

乾隆十六年三月初三日迎鑾獻詩召試行宮謝恩

恭紀

廣學開書院唐元宗仁垂聖主恩鄭洪業愚臣忝詩賦王昌齡新

渥照乾坤杜甫荷寵乘佳節裴度披香捧至尊崔立之奮飛超等

級杜甫再拜挹餘罇杜牧北闕晴光動裴夷直東方喜氣繁潘孟陽

歡娛保歷代杜審言禮異賁邱園張復元雅量涵高遠杜甫多榮

及子孫耿諱因歌大君德李衡煦育及春溫賈島

徐鏐慶原名嵩字朗齋崑山籍金匱人乾隆丙午舉人

歷官蘄州知州有玉山閣集

詩話朗齋為健庵尚書裔孫詩才清麗兼擅文辭癸卯省試已擬首選後場被貼主司刊其文曰麗大蓋聞中紅號也自有詩云虛名麗六流傳徧下第江南第一人歿後阮文達為刻遺集桃花夫人廟碑文最

爲時
傳誦

卽事

把卷卧疏雨雨斷夢亦斷不知簾外風吹我卷帙亂溼雲
互明滅庭柯夕陽半屋角一帶山晴翠落几案忽聽幽鳥
嘯餘花掩書幔

九龍山晚歸

行行出翠微一徑入斜暉黃葉有時落白雲何處飛溪長
虹暈斷稻熟蟹匡肥欲采芙蓉晚煙波隱釣磯

落葉

一夜微霜下碧林年華荏苒暗相侵幽衾酒醒重簾遠孤
館鐙昏細雨深身世飄零遷客路江關搖落故園心何須
更製哀蟬曲祇恐天涯思不禁

與君別行贈施雪颿

晉

與君一別一萬里握手相看十年矣當年射策金陵城秋
闈榜落都無名我今顛顛困一第對君出吻寒酸聲別來
難得俱無恙我入干戈爾煙瘴戎馬河西夜合圍客中遠
行愁不歸雲臺猛將去復去天山雲暗多旌旗誦君新詩
更淒絕爲君酌酒鎧花結君不見人生上壽一百年爾我
能禁幾回別

祖帳

祖帳東門道驪駒餞別筵片雲三楚樹落日五湖船酌酒
勸行客異鄉無少年西風有歸雁好盼尺書傳

絕塞

絕塞不辭苦遠行人未還西風驅萬馬落木滿三關獵火

黃龍磧軍書青海灣城南有思婦腸斷大刀環

賈汝愚字柳溪故城人乾隆丙午舉人官渾源知州有

孟門草

詩話柳溪五歲賦春雪詩稱早慧弱冠舉於鄉九上春官不第宰絳縣及牧渾源皆有善政工爲詩文連牂裔麗然不自愛惜棄成輒棄去後其子運生中丞蒐輯叢殘僅存十一

秋夜言懷

半天秋老定湖城旣醉翻愁夢不成千里鄉心隨鳥翼一
年身事聽河聲裝縣早寄征衣冷墮網空教喜子驚月下
誰家弄羌笛依稀入破夜三更

薩玉衡字檀河一字蔥如閩縣人乾隆丙午舉人官洵
陽知縣有白華樓詩鈔

江館卽事

江淮界南紀日夜向東流雨氣白沈樹風聲颯滿樓寒花
敲晚照病葉畏先秋涼笛生愁思歸心未買舟

七夕漫興

玉露金風冷畫屏南來愁見五秋螢才非服輓名何益織
不成章涕獨零世路艱難甯一水人生離合悟雙星今宵
仙會能多少漏箭休催轉翠輶

何述善聽泉圖

山深斷人跡雲白封樵徑百丈響飛泉風松靜相應科頭
來幾時寂寂坐石磴恐是焦曠仙無言獨心證夕光嵐霧
霏日色林壑暝豈爲萬慮空兼以七絃定齋心滅衆聞幽
耳滿清聽所以弃瓢翁挂瓢則聽瑩

楊灝字幼梁號復庵昌平人乾隆丙午舉人官樂亭教

諭有菊飲山房集

春日同郭汾勳徐闊齋可庵游仙人洞

仙家在何處洞口自長春鐘乳懸危座巖梯絕暗塵桃花
迷遠目草色醉行人徙倚夕陽晚山村鳥語頻

雨後望西山

雨餘山似黛縱目豁幽情天半雲猶漬峯坳翠已情裁詩
勞想像讀畫倍分明還擬延朝爽飄然襟袖輕

孫芻字力三號笠山京山人乾隆丙午舉人官羅田教
諭

登落雁山

倚杖趨危磴捫蘿上翠微水穿山腹出雲擁石門歸日落
松杉瘦年荒鹿豕肥郢南天一角零落雁孤飛

王學浩字孟養號椒畦崑山人乾隆丙午舉人有易畫

軒詩錄

蔣寶齡日椒畦初受業於同邑李多堃豫德多堃尊
人故麓臺司農甥稱入室弟子淵源有自數十年來
海內丹青家蔚然日盛其能遠法董巨近接子久思
翁南宗一派者非椒翁其誰與歸嘗自題畫冊云六
法一道只一寫字盡之寫者意在筆先直追所見雖
亂頭蓬服而意趣自足或極工麗而氣味古雅所謂
士大夫畫也中歲兼涉寫生賦色極澹自言略得元
人蒼古之趣孤生平題畫之作別有風韻卒年七十九
詩話椒畦幼孤賴母氏朱教養成入其客中生日自
述云願兒莫出門祝兒在家裏依依念此情惻惻心
傷止哀我少失怙亦更無兄弟客中度此辰十度今
九矣征塵滿衣縫含淚試一視看爾鬢毛斑幾日能
爲子語淺而意彌真
摯不獨餘藝足傳也

短句示張澹餘

作詩如噉蔗節節耐咀嚼著味在鹹酸太過反作惡希音
越以長太璞完不鑿善聽非耳爭善觀非目索笑彼支遁

愚騎折階前鶴

有懷

天末雁飛盡秋風病未蘇
驪裘知夜永對枕覺身孤
人影連花瘦詩腸斷酒枯
未知空外聽念我此時無

題顧亭林先生遺象

天生雲鶴未教飛萬古青霄望羽衣
伊傅胸期巨川楫夷齊身世首陽薇
登臨到處關經濟攷訂何人任是非
遺象清高容肅拜菰中心事尙依稀

夜起

眼前有著盡天親爲子無時已缺倫
豐祭豈能勝薄養寸心那得報三春
當年陟屺嗟游子此日題書署老人
屈指此身多歎事每懷明發涕沾巾

口占

綠渠草碧水平隄
秔稻風涼秀色齊
漸覺江鄉秋色好
蟪蛄絡緯盡情啼

陳曼生乞畫江亭敘別圖

別緒鄉心兩欲牽
宣門送客記多年
不須更上江亭望
畫到垂楊便可憐

沈嶧字東巖號簡庵天津人乾隆丙午舉人有鶯鳴集

板橋雜記題詞

紅粉成灰怨未消
香魂無數哭前朝
低徊卻憶江南夢
巷裏分明舊板橋

杜牧風懷宋玉詞
詩人例許惜蛾眉
樽前試與秋娘唱
淒絕雲昏月暗時

孫星衍字淵如一字季逵陽湖人乾隆丁未一甲二名
進士授編修歷官山東督糧道署布政使有芳茂山

人詩錄

詩話淵如與同里洪稚存黃仲則楊蓉裳齊名袁簡齋言近代詩人清才易得奇才難得淵如天下奇才也詩體近昌谷玉谿少作頗有太白神氣尤者步武建安早年博極羣書文詞華贍其後潛心模學討論金石不欲以詩傳故所自錄詩甚嚴云

宿元符宮

琳宮鎮山坳高下飛軒櫺征鞍上盤盤日暝客始停遵途
百勞忘尋異千念盈徑微已三折屋暗仍重局獨上怯曳
衣孤行危建瓴道士然炬來開門導前行靜覺鼠齧松微
聞鳥梳翎林空虎氣逼草滑蛇涎腥山頭白濛濛寒氣生
夜明猶被露華涼遠聽風笛橫悄然步初還游侶見自驚

幽房感仙蹤客夢冷易醒

李斯泰山石刻題後

穆書失政和

世傳周穆王吉日癸巳書原本以政和獵鼓取入內府亂後失之今惟有宋人摹本

疑宇文

近時審定石鼓爲宇文周時物最堅繼周數石刻惟有惟江卡雲布衣及予信之最堅

斯篆存嶧山會稽書摹勒非其真茲碑立榛莽缺畫鬼所
捫邇來碧霞宮復遭野火燔豈其坑儒魂來報焚書冤阿
房三月灰餘燄猶復然我言嬴秦罪在廢籀古文改篆而
篆亡毀經而經尊幾令周孔字禁抑不得傳非有叔重功
六義無淵原堂堂李丞相獨著倉頡篇奉詔寫石旁下筆
整不偏斥棄徒隸文程邈詎敢干法家尙刻削此蹟何真
淳試讀逐客書後愚而前賢觀其邁時屯變本亦可憐眇
然訪遺本落落區宇間愛此匪恤私持贈友意殷人身不

及紙完好無百年楚人得失弓達者忘其人題名儻留世
何必歸子孫

山齋曉起

曉風吹檐絲桐花落如翦暗綠凝愁眉溼紅團淚臉羃羃
生竹煙斑斑積階蘚蟬軀換靈質柏髮易衰鬢空簾感秋
人滌光展書餞

黃二

景仁

游黃山歸索贈長句

黃生骨格何軒軒擺脫羈紲辭籠樊俯視世俗心中煩悵
然欲與山鬼言南浮汨羅招屈原洪濤淖潏顛乾坤寸磔
幽怪償厥怨長蛟潑血江爲渾三湘七澤豐與沅參差一
聲波不喧出沒交手多嬋媛與子晞髮觀潺湲洞庭爲酒
君山樽八九雲夢胸中吞胸中壘塊誰共論扣舷大嘯呼

靈均酌以椒桂香溫磨嘗聞黃山極天門欲往叩額排帝
闥三十六峯愁攀援人跡不到哀清猿盤盤直上天宇昏
山慘怪魅來蹲蹲蠻君鬼伯舌腭反恍惚不懼存丹元昂
首大嘯捫元根陽鳥翮翥六合噉手折若木敲金盆鋪海
萬頃光沄沄容成車過紫纛幡儵忽變滅歸崑崙忽然悲
涕心自捫僕馬臨睨愁雲屯母嚙其指憂饔飧獨攜長鋏
歸田園突兀環堵積四垣堂後撫視忘憂萱採擷蘭藻供
芳蓀亦旣覲止笑以溫我時叩門日千番羅縷異境脣瀾
翻嗟我進退羝觸藩咫尺衡泌拳肩跟悲來但恐歲月奔
感慨皮肉生胼臂君獨愛我氣誼敦酣酒過從常留髡發
篋示我千璵璠元暉作友太白昆補石要使天無痕書生
有若蝨處禪曷不棄書佩玃豚十年浪跡車折轅面目變

盡聲音存雄雞一鳴驚逃琨附子不差魚化鯢

夜坐吟

斜簾織月秋波紋薄露壓草生幽芬玉階美人抱書歎珊
瑚病慵堆綠雲複牆貼樹團團影荀令心煩自取冷蜀桐
囊澀挂新愁唧唧暑蟲吟石井

玉蟾洗林光漉漉空堂楚辭不堪讀草肥蘭瘦衝涼煙石
髮游根被秋屋橫竹暮愁生隔鄰冰文簟孤吟骨驚古梁
雛燕夢離鶯割情如絲補天傾桂葉暗輸人鬢好雨塘青
帝年年老

夜起步月偕婦王采薇

殘香掩空衾出戶夜淒絕雲背度月來花梢逗煙出幽行
過籬影微步上庭樾婢僕各已眠虛扉尙開豁園空息羣

動露響下林末眾青多爭肥艾氣自孤發各懷幽棲願頗
欲避白日君疴遂侵肺我愁自淪骨怪鵬藏深柯長聲豎
驚髮回瞻虛簾下鐙冷小蟲密何時入名山共子著書畢

貴家謠

華鐙張中堂白日走相弔雌虹吸沱空妖狸坐檐笑主人
朝醉谿谷中花底衷和偕秦宮黃金堆盤夜爭詣明日斜
封出私第鳶肩倒曳狐尾衣朝下望履矜光輝閭門自畜
馬羣富令史更辱名儒爲鳴珂列戟一朝改七貴三公復
誰在饒貲入籍充水衡刺上惡名連四海前顛後蹶各不
看去作愚鬼空心酸田廬初與細民業花石又入豪家園
君不見榮名千春子雲宅才如嚴徐志琨逖堂中青鬢易
數絲門外綠蒿深一尺

潁州道中閱邸報讀弇山中丞辟雍詩及留漕疏稟
喜而有作

一品衣看入上台三雍詩就壓蓬萊身依龍尾螭頭慣筆
挾河聲岳色來賓客西都朝輩問蒼生前席帝顏開衡門
我正耽經術莫驟商量薦爾才

時擬請立三體石經

千年城費五年籌

中丞在西安奏修省城

廿萬糧加卅萬留一疏特

恩傾四海重臣從古鎮中州雲霄作事皆垂史風月他時
好上樓我趁政成初入洛龍門

伊闕一名

百尺擬同游

吳烜字鑒庵固始人乾隆丁未進士官至吏部侍郎

詩話中州舊族科第名位之盛推新安呂氏乾隆季
年固始吳氏繼之而起鑒庵性方正而接人和易官
京師數十年謝絕請託休沐餘暇焚香讀書
諸子擢大魁司文柄科第名位極一時之盛

和良泉兄詩

累深官久只增愁不比無心任去留洛水耆英如可繼東
山杖履願從游連枝曾記三生石歸棹還憑一葉舟琴鶴
蕭然真儉約寸衷精白是貽謀

馬履泰字叔安號菽庵又號秋藥仁和人乾隆丁未進

士改庶吉士歷官太常寺卿有秋藥庵詩集

詩話秋藥官比部年過三十不爲詩朱青湖其婦翁
也謂之曰子以詞賦通籍而不爲詩是農夫不修耒
耜矣可乎乃始爲詩落筆便工

雁足鐙

野煙冪冪耘夫耘老綠已活將鶩雲和土捉視爪趾分一
行蟲齧搜遺文建昭始造膏銜芬陽朔三年賜將軍蹠下
字更眇秋蟲實內大廚邇羶葷高尺有二重一斤歎息制
度精軼羣工今不藝嬉朝曛何事不異古所云然勤小物

大放紛吾將西征弔蒼髮孝武赤雁歌紛紜孝宣神爵以
瑞聞是時火德方烟燼王霸雜用鐘間鼗元帝儒緩家法
焚滅火非燕乃政君十侯並封兆黃霧一鐙雖細割炎炘
宮中老婦昧巢焚直至偃璽慘不欣怒擲階下恨嚼斷坐
見威斗延靈氛圍寢廢壞現夔夔繡帷玉座緣落紋安得
麻燭照秋蕢哀鴻夜叫霜無垠

送李莪洲司馬之湖北

又見天涯書劍游清尊話別薊門秋劇辛不作燕昭客李
白重登崔顥樓壯志大江流漢水離情白日淡幽州葛龔
亦自成千古莫恨輕車老不侯

紅石峽

金粟祠前大漠開憑高指點舊烽臺陳雲黃卷平沙去戰

血紅蒸斷峽來雁海茫茫渾不辨漳河滾滾浩難迴卽今
日暮邊聲靜坐聽嚴城鼓角催

李如筠字介夫大庾人乾隆丁未進士改庶吉士授編

修有蛾術齋詩選

詩話介夫早登詞垣甫逾壯歲遽赴玉樓遺藁亦遭
亂散佚僅存鈔本武陵趙文恪公爲其典試湖南所
得士嘗序其集謂情真思澹澆風乎大雅之音使天
假之年所造當不在蘭雪蓮裳下也

嫁魚蠻

劉王花塢珠孃宅慣倚花風送行客夜換薰篝甲煎香曉
調脂盞秋江碧蠻船月上水雞鳴紅燭珊瑚照眼明茉莉
花從宵髻放木魚歌促暗潮生舵樓一縷笙簫起萬點紅
鐙水中市沙面縱橫十字街秦樓只在煙波裏煙花名籍
落江湖別買鄰船住小姑鬻盡魚兒養魚女不隨魚戶納

魚租江南大估徘徊久裝橐千金俄撒手前月浮梁販到
茶換來黃木灣頭酒酒痕消盡又年年萬斛明珠總化煙
赤足蓬頭呼竈婢不成春夢鵬鴣天浮萍敗絮何時已人
笑人歌聲在水早知生世伴魚蝦不如早嫁魚蠻子魚蠻
一樣住風波不著人間綺與羅月明一曲漁家傲可是當
年踏臂歌

題余秋室中允試院畫美人卷

春官桃李今年盛看花閃閃雙明鏡束筍堆中樺燭爨三
十日來目光竟畫堂依然一事無操紙乞君爲作圖炊斗
黍許閉門坐美人貼紙春風扶淡墨如煙一絲裊紅藍不
到秋毫杪妝非時世憐者誰神仙特立雲霞表寒宵展卷
對明窗鎧花細雨紅凝釭奇文五色尙挂眼突然睹此心

已降文章清氣如靜女落花不言人不語世間但取笑媯
然不字有人甘獨處廣眉高髻滿城中壽陵邯鄲步不同
蕙心蘭質吾最賞亂頭粗服天然工古來嗜好酸鹹異何
況文章千古事推轂艱難國士愁蹇修錯迕蛾眉淚論文
品畫空沈吟此圖此意千黃金難求世俗國風好珍重先
生香草心

讀蔣心餘先生集書卷尾

作佛應須慧業身要知饒舌免迴輪偶然歌哭藏今古自
有文章役鬼神野史盡翻新樂府達官誰念老詩人虛空
粉碎知何住碧落依稀有待宸

光孝寺菩提樹歌和家載園韻

調御真人植大樹浩劫洗盡雷雲痕幽光獨留太古色秀

色占斷桃榔村盤根錯節幾千尺太陰慘澹龍蛇奔寶坊
百事付陵谷休上人筆懸沙門豈知此樹亦千古老幹尙
作新花繁淋漓夜半戰風雨雷公電母相吐吞天年屈指
幾輪轉長松偃柏皆兒孫要知菩提本無樹於有佛處誰
能尊塔鈴丁東吉帛裂訶子錯落鉤輈喧龐眉老僧憩寂
坐石幢風細舉經幡何王宮殿化佛國金枝玉葉空無存
牧歌樵唱自今古春風秋月磨朝昏詞客淒涼半畝宅廢
井尙冒蘋婆根梵王宮前種秋菊連天腐草流螢燐貝多
寫經大無量試與桃梗從頭論護持此樹龍象力冰雪排
盡留春溫涅槃草木尙不朽託根何不祇樹園

顧鉅字式度號蓉莊無錫人乾隆丁未進士改庶吉士
授禮部主事歷官御史有蓉莊遺藁

昭君怨

紅妝千里爲和親，傾國芳姿畫未真。
不恨妾身投塞外，卻憐漢室竟無人。

錢豫章字培生號漁莊嘉興人乾隆丁未進士歷官戶部郎中有良齋詩存

先外舅查梧岡先生詩集寄園新刻者感題

池陽官罷魏塘棲，網戶封塵草沒蹏。
破屋風摧梅影失，荒田露泣稗花低。
誰同韓偓夸雛鳳，空憶喬公感隻雞。
華屋山邱悲自昔，遺篇賴爾手親題。

次韻馥林病起偕朱梓廬雨中過飲送春之作

絕勝韶光病未知，出門猶喜及芳時。
苦嗟逝景摧霜鬢，強抑愁懷付酒卮。
泣雨今朝如送客，惜花昨歲負題詩。
慇懃

又放江城權贈藥偏縈別後思

翁樹培字宜泉大興人乾隆丁未進士改庶吉士授編

修歷官刑部員外郎有翁比部遺詩

詩話覃溪視學廣東宜泉生於使院占者謂壽命不長當出後異姓覃溪還京以語蘄石蘄石曰是宜爲吾子名之曰申錫及通籍入詞林以大考改刑曹治官書甚力仍先覃溪卒詩多題詠書畫金石之作比之覃溪正猶斜川之於東坡也

題揭鉢圖

厲詩但衍寶積經前此作者推阮亭此卷無詩但存畫淡描水墨非丹青紛拏變幻闢俶詭精怪出沒鞭雷霆飈馳電掣獸奔駛刀劍斷折紛雨零鉢底忽現小兒相手足卷曲如拘囹半空天樂下鸞馭慈光普照留雲輶我於此圖悟禪指畫師寓意加丁甯佛言貪嗔與癡愛根塵淨絕無

畦町爾緣性嗜噉人子饕餮歷飫汙羶腥是曰貪心殺機
伏輪迴轂轉不暫停爾緣幼子失所往七日徧索窮幽冥
是曰癡心墮惡趣如繭自縛迷難醒爾作狡獪聚醜類舉
旗揮刃鉗發矧是曰嗔心卽苦海無明燄熾通天庭爾因
弱雛乞援救涕洟哀籲憐伶仃是曰愛心著魔障愛未能
割況汝形四者轆轤互薰染流派那辨渭與涇遂與么麼
蠢蠕動蕃孳穀教生螟蛉鉢耶非鉢乃佛力琉璃七寶圓
光熒相與非相難執著鳩盤嫫母尹與邢神奸魑魅起妄
念愛魔未許逃天刑慈悲智慧釋塵縛空空倒挈軍持瓶
離奇恟怳震心魄花妖木客招羣靈人非人兮想非想青
燐佛火輝流螢李森朱壁不可作誰與畫手存模型不徒
羅家繪圖擬好續梵偈傳鐙銘

陳白陽古木寒鴉

兩崖老樹搖秋聲疏林撼撼飄紅英槎枒瘦削倍蕭瑟俄
看數點寒鴉橫橫處排空復成陣欲落不落棲還驚性果
求安便止宿心緣懷侶猶飛鳴商飈習習振林谷紛紛翔
集仍回縈一枝豈不故巢戀歸羽未定煩經營煙雲半抹
意恹恹樹杪遮斷紅霞明長空來往極寥廓徘徊悵望勞
浮生合離下上得所適超忽遠近隨遐征樹惟見鴉不見
葉夕陽疏影銜山晴山人靜者獨觀妙機心世慮兩不攪
臨流拄杖意何屬坐視物化無枯榮寫生取神不求似氣
味包蓄逾孤清微烘淡墨漸無迹門徑異否衡山評

南唐官硯歌

背鐫皇祐三年
歐陽文忠記

百六十字輝星躔永叔所得原叔傳我從皇祐朔保大後

先俯仰已百年宋興百年盛文治龍圖學士登集賢搜碑
手題集古錄傳信新訂薛史編夷陵舟中伴行笈玉堂爆
直供丹鉛回思初得二十載雙桂樓下屏風前牡丹姚魏
譜京洛鸚鵡眼暈摹方圓公時南京作留守此硯先已來
應天沈湮棄置忽顯豁押尾小印精雕鏤昇平回首憶疇
昔江南野老詞淒然自言幼時嘗及見金陵舊有負郭田
先朝元宗重文史縹緗器具能精妍承明石渠富珍祕廷
珪之墨澄心箋是時歙州置硯務餽廩月給唐國錢龍尾
山頭劖蒼骨羅紋坑底淘清泉尙方歲取有程課箕裘世
業彌精專溪流漸涸山脈斷滄桑變後歲月遷摩挲此硯
三歎息無端棖觸增流連一代繁華說江左萬古靈秀鍾
山川李少微名漫題記謝景山瓦曾周旋

四月十九日重登小黑山

遠山如帶拱神州兩月重來話昨游人在上方臨下界時
當初夏似深秋蔥蘢樹色千尋合罨靄嵐光四面浮山圃
桃花開正好可容借榻暫淹留

題法時帆詩龕嚮往圖

異代詩人萃一堂風流千載說柴桑打鐘掃地三生夢可
少同龕爇瓣香

三昧何能掩韋柳五言選卻右丞刪欲將畫裏徘徊意叩
取漁洋甲乙間

楊夢符字西躔號六士浙江山陰人乾隆丁未進士歷
官刑部員外郎有心止居詩集

題邵叔山先生遺集

玉清小住成朝隱未敢同高更乞閒便不終身爲祭酒也
應卒業在名山華陽肯起青龍卧臣朔原從金馬還絕似
當時庾開府暮年蕭瑟賦江關

寒山飛雪客來時座上春風次第吹獨許清神如叔寶空
慚髻歲識邱遲青衿弟子文誰似白髮詞臣序已悲昨日
聞詩過孔鯉孤兒風貌似吾師

秋夜憶別心牧並柬家惺園庶常洪大稚存

故人已別西窗雨賤子空成東閣吟檻外寒鐘殘夜酒枕
邊落木五更心貧交幾輩如公等殊俗無端變土音三日
晴皋聽過雁舊枝誰是越山禽

寄洪稚存

曾言賣賦辦歸裝歸著蓑衣住蟹莊不道雍容美車騎游

梁便擬作貲郎

移居八角琉璃井

烏衣門巷記曾游排草披榛徑獨幽桑下探環疑夙世井
間投轄爲名流登堂自有千秋意置我何須百尺樓最喜
散衙無一事買書十步大航頭

不費多金早得鄰王言孫盛往來頻車猶可售能供客釜
不因人且諱貧深巷月來常半夜晴檐花暝易成春可知
心計麤還未賣餅歌時聽最親

劉廣恕字可亭號耐泉慶雲人乾隆丁未進士歷官工
部員外郎有如心堂吟草

贈別石東庵

芳草天涯慰旅愁如何南浦有歸舟君悲十載歌長鋏我

愧三冬擁敝裘縱飲誰憐步兵酒多情獨上仲宣樓欲知
別後相思恨千里滔滔濟水流

沈叔埏字埴爲號帶湖秀水人乾隆丁未進士官吏部
主事有頤綵堂集

過祥符寺

禪院鄰水西遺宅魏公捨傳自興甯間此焉講般若經過
路欲迷徙倚殘碑下老鴟出疏林蒼鼠竄破瓦牆陰繞徑
深潭影向空瀉亭午不聞鐘此意轉瀟灑

初至中牟九堡行館

村僻林深有數家喜看麥秀一停車恩恩又向長隄去媿
爾庭前木槿花

阻雨飲澹川宅

到門凍雨洗炎溽延客迴鐙慙不速借將尊酒敘平生差
勝隻雞招近局茗椀楸枰偶作緣異時佳話任人傳一輪
蟾魄秋相識兩部蛙鳴醉欲眠

春夜宿葭露山房

短檠平移傍晚汀看花郭外舊軒櫺酒杯未放佳辰過漏
板仍容靜夜聽吟愛埽門三徑綠卧同蹋壁一鐙青瓏瓏
只是愁春減湖汊風來解掣鈴

寄題寒山舊廬追次桐城張文端韻爲錢唐陸

森作

吳山佳處占斯邱雅稱閒居與客游竹筧分泉仍入戶松
梢挂月自當樓無端石勢千尋聳不盡江聲一片流莫問
南園誰作記到來肯爲古人愁

爲韓平原
南園遺址

藏香酬袁春圃方伯

我聞小西天名曰烏斯藏有香唵叭殊無佛喇嘛妄市羸
聚蜀都貢遠陋邛杖辟邪兼辟寒卻穢同卻瘴百品壓都
梁萬里列亭障閒嘗按輿圖有足資博訪江卡至鐵凹攢
巒而沓嶂說班多以西地柏儼益益取料皆此樹枝膠連
蟠狀紅者何物成番紅花爭映叶黃者價稍昂龍鯉指爪
猛叶厥筐包桔皮其國枕葦蕩蠻夫擔重荷犏牛載兼兩
雪嶺白嵯峨金沙黃浩濛綢舍麗層霄革船渡惡浪拉薩
番語不愛珍夾霸番語豈愁掠袖編紀鎖喃舌人非謫誑
佛地佛地周末傳化人執袂願騰上靈關闢相如絕國通博望回鶻
再朝唐摩尼汗所仗明初設官司洪武六年烏斯藏招討司印見康熙間總督席
爾達偶舉事終曠不鑠入吾朝威稜德洪豔一從賜錦幢
百倍榮蕃帳繡鞞舞佞童金甲戲天將藏果釘賓筵法華

琅梵放緬昔東宗喀香界噶丹

衛地寺名

劫遷迤至衛西黃教

迭演唱達賴大智慧莊嚴具諸相甫生卽能言三世知不

妄恭逢我文殊

進表稱文殊菩薩至聖皇帝手執蓮花清淨座下

日入尤化向清

淨坐蓮花徠賓禮會抗閏年昨旱癩畏景轉炎煬老母被
隆暑世瀉嬰微恙不憚滌厠淪所苦竭津贓貧乏甲煎供
質有膏爐長珍逾握椒貽佐我白華養虛室生吉祥篆煙
乍搖颺一炷氣慚舒再熱神已王裊裊九竅透郁郁百骸
暢快比酒健羸霍如鹽療脹難老祝延齡新秋勝飲沆歎
想烏拉番語牲畜馱遠踰鄂博防牛頭記海岸鳳腦談癡聞閉
閣慚小宗循陔秉微尙行和良在茲高誼焉敢忘金鱗噴
猶餘銀鴨燼仍傍賦詩補香乘席用答嘉貺

宋鳴珂字梅生奉新人乾隆丁未進士歷官廣西桂平

悟道有心鐵石齋存橐

月夜泛舟琵琶亭次王夢樓太史壁間韻

布帆無恙且遲遲送客聊吟白傅詩
月夜有人曾問渡風流恨我不同時
江心鋪練平無迹柳岸藏星悄未知
一領青衫共淪落後之來者又伊誰

過黃州雨中望赤壁

兩賦徘徊當問月千年憑弔獨臨風
古今俯仰不相及磊落襟期難與同
極浦迷離誰揖客大江日夜自流東
秋期預訂鱸魚約擬陟巉巖夕照中

周鏐字蓮若號春田長沙人乾隆丁未進士歷官蘇州

知府有聽雲山館詩鈔

詩話春田講求經世之學守蘇州有政聲以讞獄未
當蒙重譴戍伊犁赦歸歿於河西旅舍在蘇時嘗搜

刻名人手蹟自范文正文文信國方正學于忠肅以下數十家皆手書跋語名曰人帖

田家春曉

田家無四鄰開門惟有樹不復辨山翠蒼茫見春霧攜鋤出原坂牛迹紛滿路布穀時一聲飛過西溪去

舟行雨泊

一櫂沿湘岸孤帆意黯然市鐙紅在水江雨黑沈天雲厚方堆絮風寒欲折縣遙遙泊前渚橫枕卧炊煙

陸元鉉字冠南號彡石桐鄉人乾隆丁未進士歷官高州知府有青芙蓉閣詩鈔

晚過露筋祠

野火神祠驛路迎風蒲獵獵晚寒生一聲孤櫂唱歌去明月欲來江水清

召伯堰

向晚新城道舟移鏡裏天湖寬遲鳥路水暝上漁煙澤國
吾鄉似歸程客夢先片帆從此去泛宅雪溪邊

甯遠雜詠

山連六詔迴崔嵬風土蠻鄉亦怪哉陰日披裘晴衣袷上
方積雪下聞雷刀耕地向雲中闢索度人疑域外來說與
吳儂渾未信荷花時節柏樽開

何道生字立之一字蘭士靈石人乾隆丁未進士歷官

甯夏知府有雙藤書屋詩集

詩話蘭士久官水曹工於計步嘗割宅居王陽甫惕
甫欲界牆庭中有亂磚堆君蹴其磚縱橫步數久之
日得矣翌日召匠工作如楊甫旨而磚適盡其精覈
類此法梧門稱其詩云溫純如其待人豁達如其襟
抱縝密如其行事子熙
續亦嫺詩學能世其家

卽事

黃昏風雨暗書幃客裏逢春春又歸一段閒情無著處杏
花零亂柳花飛

同人集雙藤書屋羅兩峯曹友梅張水屋合作一圖
紀事

三人合畫譏誰始兩峯友梅張風子鋪將一幅溪藤紙筆
聲颯颯風生耳一氣呵成十五指烘染如以水濟水是時
木脫秋氣高髣髴滿屋生風濤瀑布下注勢千尺飛流倒
濺茅堂茅一株兩株樹磊砢三人五人恣游遨頓令座客
發遐想栩栩競欲凌雲翺鳴呼兩峯友梅張風子肝膽一
家乃如此吾欲合傳一篇續畫史

秋雨招蒲快亭小飲

客夢因秋遠新涼逐雨生漲侵沙路輭風颭葛衣輕酒愛
閒居中詩從懶出成頽然北窗下書卷任縱橫

忻州牧汪君

本直

重修元遺山墓立祠訪其裔孫主

之盛舉也賦寄二律

晉國畸人元裕之金源文獻獨維持興亡盡入詩千首磊
塊難消酒百卮一代典章誰信史中州壇坫此雄師浣花
心事坡翁筆不及成都有舊祠

遺蹟重尋野史亭秀容城畔草青青劇憐抔土餘荒隴特
洗殘碑認舊銘此事使君堪不朽誰言詞客竟無靈雲祇
今日還祠廟應有精魂下杳冥

尹英圖號百川蒙自人乾隆丁未進士改庶吉士授檢
討厯官施南知府

過亭子墟見漁船偶賦

耶拋罾罟妾輕橈暮雨朝雲任汐潮網得一雙文錦鯉綠
楊深處醉今宵

劉廷楠字讓木獻縣人乾隆丁未進士歷官嘉應知州
署廉州府事有偶一草

詩話讓木佐文敏招降張保事具詳畿輔先哲傳所
著偶一草身後散佚曾孫修鑑從他處搜輯僅得數
十首其受降口號四首亦人佚張文襄曾見之僅憶
其一首爲修鑑口誦之故得附編文襄爲當代名臣
乃於鄉先進遺事殷殷留
意如此亦足覩其識抱也

題仲柘庵海天一覽圖

南溟上接銀漢遙誰實主之赤與寥乾輪坤軸雙丸跳陽
冰陰火冶不銷渾沌之初如浮泡狂瀾不肯循汐潮颶母
飲浪鼉鼉號山澤錯遯無支條王公設險磐石牢東崎大

虎西崖蕉三門一束如堂坳零丁雞足吾垌郊利涉索度
達沃焦梯航萬國百寶饒商賈重利狎風颺帆檣出沒無
昏朝守茲土者若斗簪蜃人龍戶俱雄梟海防海戰紛曉
曉談兵紙上嗤虛枵柘庵吏事邁常僚亭鼓無警民不佻
還慮萑苻伺劫剽欲窮澳嶼擒酋豪山壘礮磊紫瀾高望
濤遠決色無撓驚帆如葉舟如瓢長年如豆櫓如毛海童
馬銜不敢邀恍驅雷霆鞭巨鼉天水混茫一色包雲謫波
詭萬象昭或若神山隱岩嶷或若島夷分土茅或若馮夷
擊靈鼓或若陽侯馭雲驪或若羣妖視眇眇或若鬼國狀
焦僥或若蜃窟吐虹橋或若鮫室掛冰綃靈變惚恍難具
描風激浪駭促歸橈邏卒沙丁遠然膏魚姑蜺姝夜吹簫
測海今知衆言淆世所未名目已遭憶昔氛祲尚未消水

犀三千人垂囊天吳不戢鯨鯢騎幻化介鬼長鱗妖紅旗
黑幟連千艘安得周郎赤壁燒帝咨元老建節旄樓船五
月下南交封狼生羆雉卵蛟鼉虛負蜃蜃援猱右臂宜斷
左宜招近者用撫遠用剿願我素未諳鈴韜徒以命薄輕
洪濤慷慨請行浮一舸衝其壁壘搗其巢渠魁面縛不血
刀羣醜解甲齊山腰受降臺築拜嫖姚不數伏波銅柱標
書生蹈險倖偶徼虎穴得子敢告勞披君此圖白首搔雙
眸猶眩心旌搖方今環海滌腥臊影沙磧石無逋逃餘殄
猶恐孕蠭螭安不忘危是吾曹與君誼結古同袍老矣壯
志未全拋共抒心力答熙朝非徒奇絕詔游遨

李東田明經用東坡石鼓韻留別次韻奉和

我生之時在己丑彈指流光變童叟廿年嶺海蟻磨旋又

到梅州牛馬走舊業全拋嗤負腹新政試行慎防口此邦
文物盛淵源多士雲龍爭先後伊昔締交識一二於今望
氣得八九驅車不須避陽鱗閉門無從見泄柳比年校士
屬有司仔細量才數升斗鮮新差擬管生花詰屈或若柏
生肘模糊老眼溷場師得毋蘭艾埋蒿莠五羊名士今謫
仙三載盟心吾畏友別裁僞體黜軋苗譌字方言辨乳穀
譬彼象罔索元珠瞭如伏生識蚪蚪青雲意氣愛少年白
首心情憐宿耆我昔懷鉛佐玉尺候蟲時鳥紛唧噥漫屈
諍人伸僬僥敢重商提輕梁自所懼相皮反遺骨五色全
迷目同瞍二十八宿動星文指點翼峒與離巉陋儒一得
竊自喜與君論文覺顏厚清言明理瓶瀉水宗派支流析
某某多錢不敢傲貧兒良賈深藏如烏有卻慚俗吏逐風

塵委置詩書習鞭杻餉我新詩抵百朋應付瑯嬛鎖雙狗
惜哉梳妝不入時待字頻年猶未偶翻許劉安有仙骨解
得徐鉉爲龍首瑰然大璞不彫琢留待良匠施攻培老手
斲輪自有真雕蟲小技何足取傳觀見說愈頭風長吟頓
使滌心垢雲路從此看騰達風檐莫更歎株守總然良馬
感孫陽不遇先覩或同朽一編願付青梅巢梨棗長媿喬
松壽

張保受降口號

鼙鼓聲中泛上游海門何處覓封侯城頭指點洪濤裏劉
令生還一葉舟

顧敏恆字立方號笠舫金匱人乾隆丁未進士官蘇州
教授有笠舫詩藁

詩話笠舫詩思深辭贍論古尤見識力亦嗜倚聲兼
師玉田夢窗並工駢文嘗游貴池撰昭明太子廟碑
隨園見之以爲六朝高手既知出笠舫
深爲歎賞笠舫爲作感知賦一時誦之

澄江寓舍夜雨偶成

蕭蕭涼雨滿江城水國秋風感慨生
鳬鶴短長甯有定雞蟲得失未須爭
寒雲遶樹歸鴻影細雨疏鐙落葉聲
不識淺斟低唱好等閒拋卻換浮名

夜宿祐國禪院

夕磬警虛堂秋衾宿上方一聲聞白雁
昨夜落青霜古柏深深影旒檀細細香
孤吟同半偈題向贊公房

沈清瑞初名沅南字吉人又字芷生長洲人
乾隆丁未進士有沈氏羣峯集

詩話諸城劉石庵視學江南芷生應童子試石庵命
分詠吳中古蹟十二題不移晷而成石庵擊節曰此

生如芝草鳳凰清時之瑞也因易名清瑞歿年甫踰
四十所著帝王世本春秋世系考史記補注孟子逸
語皆未及成詩
文亦多亡軼

寄陳小梧元基楚中

芳渚東風長蕙蓀知君倚棹過荆門雲生晚郭連山色雪
盡春江見岸痕舊笛夢吹吳地遠新潮愁對楚天昏夜分
應恨猿吟苦暝宿湘南煙水村

龍潭道中雨後同陳小梧元基詹湘亭應甲賦

一雨涼如此西風吹苧衣數螢隨露下獨鳥背煙飛驛路
秋聲早溪橋夜火微共投何處宿隔水叩柴扉

秋月

夜色涼於水風高朔雁還長空一片影吹落萬松間思婦
高樓上含愁照玉顏可憐千里道何處是秦關

呈贊東皋先生

昌黎山斗人倫表六一文章海內名末座趨陪容賤子中
朝風雅屬先生士誇望比龍門峻吏說官如浙水清廿載
春風重持節越江花發待雙旌

度縉雲嶺宿嶺下村舍

黃龍隘口來崎嶇地險最一徑青天通兩傍白石礙莽莽
虎跡深蒼蒼樹形怪傾崖漏斜陽光照飛鳥背迢迢上絕
頂山路狹如帶興夫側足行二分垂在外氣促不得喘十
步九倒退非意得寬坦延眺心頗快雲中辨括州天外望
吳會是時天驟寒林長野風大行李落葉中緼屬負與載
前途黯將夕暮色起古檜投宿竟誰家荒村隔煙靄

石門洞觀瀑布作

驚雷破山走犖确瘦蛟跋浪恣拏攫兩峯對抱勢如束中
間一瀉千丈落廬山瀑布稱奇絕此處石門良不惡珠璣
紛紛下雲端琴筑喧喧出林角青田先生昔此居坐嘯名
山蘊奇略未爲蒼生作霖雨先耽野趣尋邱壑萬頃瀉入
胸懷間意氣豪雄共歎薄坎流良止悟行藏壁月蘿風寫
憂樂迄今來訪讀書處洞門苔封青岬嶸噴流濺沫溼人
衣四山無雲雨聲作雨聲泉聲杳不分疑是先生夜讀凭
山閣

晚晴移詩匯卷一百五終